



სახელმწიფო შესყიდვების
სააგენტოს თავმჯდომარის
გ ა ნ კ ა რ გ უ ლ ე ბ ა



KA080199579524519

№ 3692

04 / სექტემბერი /
2019 წ.

შპს „ნიტატურის“ გაფრთხილების შესახებ

შემსყიდველი ორგანიზაცია: სსიპ „ეროვნული სატყეო სააგენტო“;

ტენდერის ნომერი: SPA180006048;

შესყიდვის ობიექტი: 77200000 – სატყეო მეურნეობასთან დაკავშირებული მომსახურებები;

მიმწოდებელი: შპს „ნიტატური“ (ს/ნ: 419995189);

წერილობითი შეტყობინების საფუძველი: სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულება.

აღწერილობითი ნაწილი

1. ადმინისტრაციული წარმოების დაწყება

1.1. სახელმწიფო შესყიდვების სააგენტოში 2019 წლის 1 აგვისტოს წარმოდგენილ იქნა სსიპ „ეროვნული სატყეო სააგენტო“ 2019 წლის 1 აგვისტოს №01/10618 წერილობითი შეტყობინება (რეგისტრაციის №8382), რომლითაც სააგენტოს ეცნობა შპს „ნიტატურის“ (ს/ნ: 419995189) მიერ SPA180006048 ელექტრონული ტენდერის საშუალებით დადებული 2018 წლის 2 აგვისტოს № 170 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების თაობაზე.

1.2. მიმწოდებელს სააგენტომ, სახელმწიფო შესყიდვების ერთიან ელექტრონულ სისტემაში მის პროფილში მითითებულ ელექტრონული ფოსტის მისამართზე iliamiqava1984@gmail.com, 2019 წლის 7 აგვისტოს № 3098 წერილით აცნობა შემსყიდველი ორგანიზაციის შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე წერილობითი განმარტების წარმოდგენა. მიმწოდებელს განმარტება არ წარმოუდგენია.

2. შემსყიდველი ორგანიზაციის პოზიცია

შემსყიდველი ორგანიზაციის წერილობითი შეტყობინების თანახმად, მიმწოდებელმა არაჯეროვნად, კერძოდ, არასრულად და ხელშეკრულების პირობებთან შეუსაბამოდ შეასრულა 2018 წლის 2 აგვისტოს № 170 სახელმწიფო შესყიდვის შესახებ ხელშეკრულებით ნაკისრი ვალდებულებები, კერძოდ, ტყეკაფი გაუნმენდავია ნარჩენებისგან. ამასთან, გასულია ხელშეკრულების მოქმედების ვადა.

3. მიმწოდებლის პოზიცია

ადმინისტრაციული წარმოების ფარგლებში მიმწოდებელს განმარტება არ წარმოუდგენია.

4. სააგენტოს მიერ დადგენილი გარემოებები

4.1. 2018 წლის 5 ივლისს სსიპ „ეროვნულმა სატყეო სააგენტომ“ გამოაცხადა SPA180006048 ელექტრონული ტენდერი ხე-ტყის დამზადებასთან დაკავშირებული მომსახურებების (CPV77210000) შესყიდვის მიზნით.

4.2. სატენდერო კომისიის 2018 წლის 27 ივლისის № 3 სხდომის ოქმით, ტენდერში გამარჯვებულად გამოვლინდა შპს „ნიტატური“ (ს/ნ: 419995189) და ამავე სხდომის ოქმით, იგი მიწვეულ იქნა სახელმწიფო შესყიდვის შესახებ ხელშეკრულების გასაფორმებლად.

4.3. 2018 წლის 2 აგვისტოს მხარეთა შორის გაფორმდა № 170 სახელმწიფო შესყიდვის შესახებ ხელშეკრულება, რომლის თანახმად, მიმწოდებელს შემსყიდველი ორგანიზაციისთვის უნდა გაენია სამეგრელო-ზემო სვანეთის რეგიონში, სავარაუდოდ (საორიენტაციოდ) 586,17 მ³ წინვოვანი და ფოთლოვანი სახეობის ხე-ტყის/მერქნული რესურსის (სოჭი, ნაძვი, წიფელი) დამზადების მომსახურება 2018 წლის 1 დეკემბრამდე. ხელშეკრულების ღირებულებად განისაზღვრა 41 289,81 ლარი, ხოლო მოქმედების ვადად – 2019 წლის 7 მაისი.

4.4. ხელშეკრულების №1 დანართით გათვალისწინებული ტექნიკური დავალების 1.4.1 პუნქტის თანახმად, მიმწოდებელი ვალდებული იყო, ტყეკაფზე ხე-ტყის დამზადების შედეგად მიღებული ნარჩენები განეთავსებინა კანონმდებლობის შესაბამისად.

4.5. სსიპ „ეროვნული სატყეო სააგენტო“ მიერ განხორციელებული სახელმწიფო შესყიდვების ხელშეკრულების შესრულებაზე კონტროლის განმახორციელებელი ჯგუფის 2019 წლის 10 ივლისის № 170 საბოლოო დასკვნით დგინდება, რომ მიმწოდებელმა სრულად აითვისა გამოყოფილი ტყეკაფი (ცდომილება გამოყოფილ და ფაქტობრივად დამზადებულ მერქნულ რესურსს შორის არ აღემატება 10%-ს), თუმცა ტყეკაფი გაუნმენდავია ნარჩენებისგან.

4.6. შემსყიდველმა ორგანიზაციამ 2019 წლის 30 ივლისის № 01/10440 წერილით მიმართა მიმწოდებელს, მიუთითა, რომ ვალდებულება შესრულდა დაგვიანებით და არაჯეროვნად, მან ვერ შეძლო ტყეკაფის ნარჩენებისგან დასუფთავება და დააკისრა ხელშეკრულებით გათვალისწინებული პირგასამტეხლო.

4.7. მხარეთა შორის გაფორმებული მიღება-ჩაბარების აქტების თანახმად, მიმწოდებელმა ფაქტობრივად შეასრულა 38 885,69 ლარის ღირებულების ვალდებულება.

სამოტივაციო ნაწილი

5. შემაჯამებელი დასკვნა

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „ნიტატურს“ უნდა მიეცეს გაფრთხილება.

6. გამოყენებული სამართლებრივი აქტები

სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

7. სამართლებრივი შეფასება

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის მე-4 პუნქტის „ბ“ ქვეპუნქტის თანახმად, სახელმწიფო შესყიდვის ნებისმიერი საშუალებით განხორციელებისას, გარდა კონსოლიდირებული ტენდერისა, პრეტენდენტის/მიმწოდებლის შავ სიაში დარეგისტრირების საფუძველია, თუ მიმწოდებელმა ვერ შეასრულა ან არაჯეროვნად შეასრულა ხელშეკრულებით ნაკისრი ვალდებულებები. იმავდროულად, აუცილებელია, რომ ხელშეკრულების მოქმედების ვადა იყოს გასული ან ხელშეკრულება ვადაზე ადრე იყოს შეწყვეტილი.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/მიმწოდებლის შავ სიაში დარეგისტრირების საფუძველი, სააგენტო, ამ მუხლის შესაბამისად, იღებს გადაწყვეტილებას პრეტენდენტის/მიმწოდებლის გაფრთხილების ან შავ სიაში დარეგისტრირების შესახებ.

7.3. განსახილველ შემთხვევაში, დგინდება, რომ მიმწოდებელმა არაჯეროვნად, კერძოდ, არასრულად შეასრულა მხარეთა შორის გაფორმებული 2018 წლის 2 აგვისტოს №170 ხელშეკრულება, ვინაიდან ტყეკაფი გაუნმენდავია ნარჩენებისგან. ამასთან, გასულია ხელშეკრულების მოქმედების ვადა. ამდენად, არსებობს მიმწოდებლის გაფრთხილების ან შავ სიაში დარეგისტრირების საფუძველი.

7.4. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-3 პუნქტის შესაბამისად, გაფრთხილების ან შავ სიაში დარეგისტრირების შესახებ გადაწყვეტილების მიღებისას, სააგენტო, საქმისთვის მნიშვნელობის მქონე გარემოებებთან ერთად, დამატებით ითვალისწინებს დარღვევის სიმძიმეს, პრეტენდენტის/მიმწოდებლის მანამდე მიღებული გაფრთხილების თუ შავ სიაში რეგისტრაციის ფაქტ(ებ)ს, მისი სახელმწიფო შესყიდვებში მონაწილეობის აქტივობას.

7.5. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტის თანახმად, გაფრთხილების შესახებ გადაწყვეტილება მიიღება იმ შეთხვევაში, თუ შემსყიდველი ორგანიზაციის მიერ წარდგენილი წერილობითი შეტყობინება სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს, მაგრამ პრეტენდენტის/მიმწოდებლის შავ სიაში დარეგისტრირებით დაირღვევა თანაბრობის პრინციპი. გაფრთხილება გამოიყენება ერთხელ და მოქმედებს ერთი წლის განმავლობაში. გაფრთხილებულ მიმწოდებელთა სიას სააგენტო განათავსებს ვებგვერდზე.


7.6. სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოხსენებული წესის მე-3 და მე-4 მუხლებით განსაზღვრულ მოთხოვნებს. ამასთან, მართალია, მიმწოდებელმა, ხელშეკრულება შეასრულა არაჯეროვანად, თუმცა სააგენტო ითვალისწინებს იმ გარემოებას, რომ მან შემსყიდველ ორგანიზაციას სრულად მიაწოდა ხელშეკრულებით გათვალისწინებული საქონელი. ამდენად, სააგენტო მიიჩნევს, რომ, ამ ეტაპზე, შპს „ნიტატურის“ შავ სიაში დარეგისტრირებით დაირღვევა თანაბრობის პრინციპი და მიზანშეწონილია მის მიმართ გაფრთხილების გამოყენება.

სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის №19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტით და დაადგინა:

- 1. შპს „ნიტატურს“ (ს/ნ: 419995189) 2019 წლის 5 სექტემბერს მიეცეს გაფრთხილება.
- 2. დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს სააგენტოს ვებგვერდზე შესაბამისი ჩანაწერის გაკეთება.
- 3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი, მე-12 კმ, №6), კანონმდებლობით დადგენილი წესით.

თავმჯდომარე



ლევან რაზმაძე